



KENYATAAN MEDIA
KEMENTERIAN SUMBER MANUSIA
MAJLIS PERASMIAN PENUTUP HARI PLWS

Kuala Lumpur, 19 September 2017 – Majlis Perasmian Penutup Hari PLWS anjuran Jabatan Perhubungan Perusahaan Malaysia (JPPM) dengan kolaborasi bersama Perbadanan Produktiviti Malaysia (MPC), Pembangunan Sumber Manusia Berhad (PSMB) dan SME Corp. Malaysia (SMEECorp) telah disempurnakan oleh YB Dato Sri' (Dr) Richard Riot Anak Jaem, Menteri Sumber Manusia, di Royale Chulan Kuala Lumpur.

Productivity-Linked Wage System, atau dikenali sebagai PLWS, menjadi Agenda Nasional dan diberi tumpuan khusus di dalam Rancangan Malaysia Ke-11 yang telah dibentangkan oleh YAB Perdana Menteri pada 21 Mei 2015.

Program Hari PLWS yang julung kalinya diadakan ini adalah untuk mempromosi pelaksanaan PLWS di kalangan majikan khususnya majikan Industri Kecil dan Sederhana (SME). Pengisian program ini yang berlandaskan konsep penganjuran Pertandingan Anugerah PLWS Piala Menteri Sumber Manusia bagi Industri Kecil dan Industri Sederhana adalah merupakan satu usaha pihak Jabatan Perhubungan Perusahaan Malaysia (JPPM) dan Kementerian Sumber Manusia untuk memberi pengiktirafan kepada syarikat-syarikat daripada Industri Kecil dan Industri Sederhana yang berjaya memperlihatkan kesungguhan dalam pelaksanaan PLWS di syarikat-syarikat mereka.

Berdasarkan laporan di dalam *World Competitiveness Yearbook* tahun 2017 yang dikeluarkan oleh *Institute for Management Development*, Malaysia berada di kedudukan 24 dalam *The World's Most Competitive Countries* daripada sejumlah 63 buah negara. Hasil laporan *Global Competitiveness Report 2016 – 2017* pula, telah meletakkan Malaysia di tangga ke-25 daripada 138 buah negara dari segi indeks daya saing berkaitan upah dan produktiviti.

Pihak JPPM pada dasarnya telah berjaya membawa konsep PLWS ini ke hadapan melalui pelbagai inisiatif dan program-program yang ternyata memberikan manfaat kepada golongan majikan dan pekerja di negara kita. Usaha Hari PLWS ini di sektor industri kecil dan sederhana yang berdaya maju menjadi salah satu strategi utama dalam usaha negara kita memperluaskan sumber pertumbuhan dan mengekalkan momentumnya sepertimana yang jelas terkandung di dalam Rancangan Malaysia Ke-11.

Dalam pada itu, YB Dato Sri' (Dr) Richard Riot Anak Jaem, Menteri Sumber Manusia dijangka akan merasmikan ASEAN-PLiC pada 10 Oktober 2017, bertempat di Pullman Kuala Lumpur City Center. Program tersebut akan dihadiri oleh 250 orang peserta yang terdiri daripada 10 negara ASEAN dan rakan dialog iaitu Jepun, Korea dan China.

###

Dikeluarkan oleh:
Unit Komunikasi Korporat
Kementerian Sumber Manusia
19 September 2017